

未來世。經十三劫。不墮地獄畜生餓鬼。天上人中。常受快樂。受最後身。得成辟支佛。號曰度生死海。廣度眾生。不可限量。是故笑耳。爾時諸比丘。聞佛所說。歡喜奉行。

二七、婢使以栴檀香塗佛足緣

佛在王舍城迦蘭陀竹林。時彼城中。有大長者。有一婢使。稟性賢善。敬信三寶。每於一時。為其大家。磨栴檀香。暫出門外。見佛世尊。著衣持鉢。將諸比丘。入城乞食。心懷喜悅。尋還入內。取少栴檀。塗佛足上。佛以神力。令此香雲鬢鬣垂布。遍王舍城。時彼女人。見是變已。倍生信敬。即便以身五體投地。因發誓願。以此香氣供養功德。使我來世永離貧窮下賤之身。早成正覺。廣度眾生。如佛無異。發是願已。佛便微笑。從其面門。出五色光。遶佛三匝。還從頂入。爾時阿難。而白佛言。如來尊重。不妄有笑。以何因緣。今者微笑。唯願世尊。敷演解說。佛告阿難。汝今見是長者婢使。以栴檀香塗我足不。阿難白言。唯然已見。此長者婢。以栴檀香塗我足上善根功德。於未來世九十劫中。身體香潔。不墮地獄畜生餓鬼。

天上人中常受快樂。受最後身。得成辟支佛。號栴檀香。廣度眾生。不可限量。是故笑耳。爾時諸比丘聞佛所說。歡喜奉行。

二八、貧人拔提施佛焦木緣

佛在舍衛國祇樹給孤獨園。時彼城中有一貧人。名曰拔提。為他守園。用自存活。每於一日。擔一焦木。入城欲賣。值城門中。見一化人。語貧人言。汝今若能持此焦木。用與我者。我當施汝百味飲食。時彼貧人聞化人語。心懷歡喜。即便以木授與化人。化人答曰。汝今持木。隨我從來。共詣祇桓。當與汝食。時彼貧人即相隨。遂到祇桓中。見佛世尊。三十二相。八十種好。光明普曜。如百千日。心懷歡喜。前禮佛足。即以焦木奉施世尊。世尊受已。插入著地中。佛以神力。令此焦木須臾之間。枝條生長。花果茂盛。團圓可愛。如尼拘陀樹。世尊在下。結跏趺坐。為諸人天百千萬眾。演說妙法。貧人見已。心懷喜悅。即便以身五體投地。發大誓願。以此施佛焦木功德。使我來世得成正覺。廣度眾生。如佛無異。發是願已。佛即